

C ☞ V ☞ D

A ☞ I ☞ G ☞ G

1 5 ☞ 8 6



Ar. 3

P. f. 140

Theol.

P. VI. 319. 594.



17
Christliche

Klag vnd Grabschrift/

Des Durchlauchtig-

sten/Hochgebornen Fürsten vnd Herrn/Herrn

AVGVSTI/weiland Herzogen zu Sachsen/ des H. Röm.
Reichs Erzmarschaln vnd Churfürsten/Landgraffen in Düringen/
Marggraffen zu Meissen/vnd Burggraffen zu Magden-
burg/ıc. vnfers gnedigsten Herrn.

Welcher in Gott seliglich von diesem jämmerthal abgeschieden/

Anno Ch. 1586. den 11. Febr. vmb 6. vhr gegen abend/

Seines alters im 59. jahr/ 6. Monden/

1. Wochen/ 5. Tage.

Das Begrebniß ist zu Freiberg gehalten den 14. Martij/
Montags nach Latare.



Seiner Churf. G. zu ehren vnd rühmlichem gedechtniß/

Auch allen frommen Christen/ in jetzt gefehrlicher betrüben

zeit/ zum trost/vnd trewen erinnerung zum Gebet/

gestellet / Durch

Laurent. Faustum/ Pfarrern zu Schirmenitz.

Das Buch
von der
... ..

... ..
... ..
... ..

... ..
... ..
... ..

... ..
... ..
... ..
... ..
... ..
... ..
... ..
... ..
... ..
... ..

... ..
... ..
... ..
... ..



Dem Durchlauchtigsten / Hochgebornen Fürsten
vnd Herrn / Herrn Christiano / Hertzogen zu
Sachsen / des heiligen Römischen Reichs Erzmars-
schaln vnd Churfürsten / Landgraffen in Düringen /
Marggraffen zu Meissen / Burggraffen zu
Magdeburg / etc. Meinem
gnedigsten Herrn.

Siedigster Churfürst vnd
Herr / demnach vnser lieber
Gott / wegen vnser schweren
sünd ein allgemein betrüb-
tes leid vnd schmerzliches trawren / al-
lenthalben erregt / Also / das wegen des
Durchlauchtigsten / Hochgebornen Für-
sten vnd Herrn / Herrn Augusti / weiland
Hertzogen vnd Churfürsten zu Sach-
sen / etc. E. Churf. S. hertzgeliebten vnd
seligen Herrn Vaters / vnvorschnlichen
vnd doch seligen abschieds / seiner Churf.
S. hertzbetrüben hinderlassenen Wid-
win / beneben E. Churf. S. vnd dersel-
ben hochgeliebten Gemahl / vnd den
A ij Krew-

Vorrede.

Frewlein/etc. nicht allein viel hohe Königliche/ Chur vnd Fürstliche/ Adelige vnd andere fürneme personen/ sondern auch alle Christliche gemeine Unterthanen/ der gantzen trewen Landschafft/ sehnlichs vnd hertzlichs mitleiden tragen helfen/ Als habe E. Churf. S. ich solches in volgender schrift/ vnterthenigst zuuerstehen geben wollen/ Darin kürzlich mit angezogen/ wie solcher trawriger leidfall in warer erkentnis vnserer vielfeltigen mißhandlungen vnd ernster anruffung zu Gott/ anzunehmen/ vnd was sich alle betrübe hertzen darbey zu trösten/ fürnemlich auch/ daß hochgedachten seligen Churfürsten vnd Herrn/ hochrühmliche tugende/ grosse gaben/ vnd trewe wolthaten/ bey menniglich in frischer gedechtnis bleiben/ vnd zu löblichem exempel menniglich fürgebildet werden möchten.

Ist derwegen an E. Churf. S. mein
vnters

Vorrede.

unterthenigste vnd demütigste bitte/ E.
Churf. S. wollen ihr solchen geringsche-
tzigen/ vnd doch trewlich gemeinten un-
terthenigen/ fleis in gnedigster auffne-
mung gnedigst belieben vnd gefallen
lassen.

Vnd bitte von hertzen/ der Vater al-
ler gnaden vnd barmhertzigkeit / wolle
E. Churf. S. hochbetrübtet hertz in vor-
leihung Christlicher gedult/ durch seinen
heiligen Geist selbst stercken vnd trösten.
Auch E. Churf. S. zur friedlichen vnd
glücklichen regierung/ zu sampt Ewer
Churf. S. hochgeliebten Gemahl/ junge
Herren vnd Fräwlin/ in guter bestendi-
ger leibsgesundheit/ zu gnedigstem segen/
schutz vnd erhaltung/ dem allgemeinen
lieben Vaterland / vnd der betrübten
Christenheit zum trost vnd wolfart /
im gnedigst vnd trewlichst befohlen sein
lassen/ Amen.

Datum den 24. Februarij/ an wel-
chem

A iij

Vorrede.

chem tage/ Anno 1548. Keyser Carolus
V. Churfürsten Mauritio milder ge-
dechnis/ die Regalien der Chur Sachsen
auff offentlichem Reichstage zu Aug-
spurg/ solenniter vberreicht/ vnd dar-
bey sein Churf. S. so wol auch Churfür-
sten Augustum vnd seiner Churf. S.
Erben/ mit der Chur vnd Marschall-
ampt zum ersten belehnet.

E. Churf. S.

Unterthenigster Diener/

Laurentius Faustus /
Pfarrer zu Schirmenitz.

Christ

Christliche
Klag vnd Grabchrift/

Des Durchlauchtigsten / Hoch-
gebornen Fürsten vnd Herrn / Herrn
Augusti / weiland Hertzogen zu Sachsen / des H.
Röm. Reichs Ertzmarschaln vnd Churfürsten /
Landgraffen in Düringen / Marggraffen zu Meissen /
vnd Burggraffen zu Magdenburg / etc.
vnfers gnedigsten Herrn.

A Ross klag vnd leid entsteht zuhand /
In Sachsen vnd ganz Deutschem
land.

Die hochbetrübtte Christenheit /
Steht in groß not vnd trawrigkeit.

Churfürst August der tewere Helde
Ist abgeschieden von der welt.

Dauon nicht allein kompt gros schmerz
In hochbetrübtter Christen herzk.

Sondern zugleich in solcher zeit /
All Creatur tregt grosses leid.

Des Landes grundfest wanckt vnd bibt /
Die Sonn ihri klaren schein nicht gibt.

Die lufft geht scharff / rauch / trüb vnd kalt /
All Biewm stehn trawrig in dem Walt.

All Wasserström thun oberstieffen /
Trawrig das ganze Land begiessen /

Mit

Mit seuffzen/ klag vnd threnen mild/
Sind alle ort im Land erfüllt.

Der Churfürstin erfrewtes hertz
Steckt nu vol trübsal angst vnd schmerz.

Hertzog Christian der junge Herr/
Ist schmerzen vol/ vnd trawret sehr.
Darzu die fürstlich Frewelein/
Vmb ihrn Herrn Vater trawrig sein.
Viel Könige/ Fürsten vnd Landherrn/
Thut solcher todsfall hoch beschwern.
Denmarck/ Brandenburg/ Pfaltz/ vnd Anhalt/
Braunschwig/ sind all trawrig gestalt.
All Stedt vnd Christliche gemein/
Kirchen vnd Schuln betrübet sein.
All Glocken trawrig klingen im Land/
Ein jeder tregt ein schwarz gewand.
Denn des Lands Vater ist nu todt/
Wir armen Waisen stehn in not.

Dan. 4. Der schönste Baum ist ombgefallen/
Der schatten gab den Thierlein allen.
Wo solln nu wir arm Scheffelein
Für hitz vnd wetter sicher sein?
Gott lest ons sehn sein straff vnd zorn/
Weil all wolthat an ons verlorn.
Es warnt vnd dreut Gott wie er woll/
Die Welt bleibt sünd vnd bößheit voll/

Drumb

Drumb ist solchs zuuerrundern nicht/
Das Gott mit vns geht ins gericht.

Alch traw du gankes Römisch reich/
Deutschland flag dein elend zugleich.
Dein sterckste Seul vnd auffenthalt/
Ist hingefelt durch tods gewalt.
Mit schaden wird man inne werden/
Was solcher Herr genüzt auff erdn.
Wer kan verdanken all wolthat/
Die Gott durch ihn erzeiget hat.
Des Reichs Aug vnd Herz ward genandt/
Darzu Deutschlandes rechte hand.

Ven vier Keysern trug das Churschwert/
Welch in all glibet vnd geehrt.
Im Marschallamt mit glück er war/
Bis in das drey vnd dreissigst jahr.
Sein gros weisheit vnd hoch verstande
In viel Reichsachen ward erkandt.
Er war für alln ein Wunderman/
Sein lieb vnd gnad wolt jeder han/
Sein gros tugend vnd glück vrsacht/
Das in Freund vnd Feind hoch geacht.

Der Keyser Maximilian stet/
Fürm end sein Sohn vermanen thet/

B

Nach

Nach ihm sie solten diesen Herrn/
Als ihren Vater hoch lieben vnd ehren.
So würd ihn von Gott gnad vnd segn
In ihrem stand glücklich begegn.

Wann zwischen Königen auffer land/
Sich streit vnd gros zwiespalt empfand/
Auff den Churfürsten ward gestellt/
Das er solchs streits ein vrtel fellt/
Was er für recht erkant vnd sprach/
Darnach ward hngelegt all sach/
Zeglich viel frembd Legation/
3. Reg. 4. Gleich wie bey König Salomon/
Suchten bey ihm weisheit vnd rath.
Gros ehr erzeigten ihm mit der that.

Drey ding sind die er tewer geacht/
Mit grosser sorg dabey gewacht/
Das Gottes Wort/Fried/Gerechtigkeit/
Im Land erhalten würd allzeit.

Religio. Seins hertzen einge frewd vnd hort/
War Gottes seligmachend wort/
Aus Israelis brunnen zart/
Sein hertz vnd seel erquicket ward/
Für solchen schatz Gott herzlich danckt/
Dauon mit keinem fuß nicht wanckt.

Josias

Josias ihm ein fürbild war
Zur beständigkeit in reiner lahr.
Darzu dem König Josaphat/
Gantz löblich nachgefolget hat.
Israels Wagen vnd Fuhrman/
Ein Christlich Ritter thet bestahn/
Zum Symbolo braucht er stets fort/
Erhalte vns HErr dein Göttlich wort.

4. Regum

22.

3. Regum

22.

3. Reg. 2.

Hier. 15.

Die Predigt hört er mit andacht/
Viel zeit mit Gottes wort zubracht/
In heilger Bibel ist kein blat/
Das er nicht offte durchlesen hat/
Wenn er Lutheri Bücher laß/
Nichts diesen Herrn ergetzet baß/
Vnter sein Schetzen er gros acht/
Das er mit fleis zusammen bracht/
Die schönst vnd herrlichst Liberer/
Desgleichen kaum zu finden sey.

Das Gottes wort weit ward bekandt/
Auff viel sprachen gros vnkost wandt/
Auch das er selber schepffen fundt/
Aus Israelis Brünleins grundt/
Der heiligen Hebraischen sprach
Er treulich hat geforschet nach/
Daran auch keinen fleis gespart/
Bis er derselben kündig wart/

B ij Durch

Durch sein selbst künstlich Druckerey
Ist sehr gesterckt manch Liberey.

Seinen Hoffpredigern mandirt/
Wann er etwan aus schwachheit irrt/
Solten erinnern ihn bey zeit /
Vnd sorgen für sein seligkeit/
Damit sie nicht trügen die bürd/
Wans Gott von inen fordern würd.
Er hat auch selbst geordnet an
Gebet/Beicht/ Absolution.
Die nach alln predigten öffentlich/
Nach Kirchen brauch werden verricht/
Zu Gottes ehr bey reinem wort/
Die herrlichst Cantorey man hort/
Die Kirch erschalt mit schönen klang/
Von Lateinisch vnd Deutsch Gesang.
Das auch Gottesdienst stets blieb im schwang/
Im Schloß man teglich Vesper sang/

Ließ all sein fleis vnd fürsorg sein/
Daß Gottes wort im Land blieb rein/
Der Antichrist mit list vnd tück
Hat oft geschwind versucht sein glück/
Wie Churfürst Moritz vnd dieser Herr
Vnter sein joch zu bringen wer.
Gott lob/solchs ist omb sonst gewest/
Weil vnser Herr am wort hielt fest.

Zu

Zu Interims zeit er hefftig wehrt/
Das die Kirch mit kein grewol beschwert. 1548.

Zur Naumburg auff dem Fürsten tag/
Als allenthalb war grosse flag. 1555.
Der Churfürst riecht ganz veterlich/
Das sie durchaus vereingten sich.
Von der zeit ist verendert nit.
Die recht Religion vnd fried.

Sein hertz mit flag sich hoch bewegt/
Wann sich falsch lehr im Land erregt.
Gab sich auch nicht zu frieden ehr/
Bis einigkeit ward in der lehr/
Auff das wir hetten gewissen grund/
Zur seligkeit zu jeder stund.

Gar schmerzlich ihm zu hören war/
Der Sacramentschwarm offenbar.
Gott hat sein hertz dauon gewandt /
Das er den tilget aus dem Landt.
Ob wol solch gifft noch heimlich steckt/
In vielen hertzen zugedeckt.
Die Christum lestern ins gesicht/
Schrecklich wird ihn sein Gotts gericht.
Damit nu fort falsch lehr verhut/
Hat auffgewandt ein grosses gut/

B iij

Zu

1574.

Zu Torg vnd sonst offte hielt Conuene/
Wegen der lahr vom Sacrament/
Concordien buch ward gestiftt/
Welchs durchaus mit Gotts wort eintrifft/
Die Augspurgisch Confession
Bracht wieder richtig auff die bahn.

Weil auch all Regiment sind schwach/
Dhn glerter Leute kunst vnd sprach/
Ein grosse summe stracke jehrlich dar/
Zur halten disciplin vnd lahr.
Auff Vniuersiteten mild
Viel glahrter Menner er auffhielt.

1543.

Drey Fürsili: h Schulen hoch geziert/
Für die Landkinder sind fundirt/
Fördert trefwlich die studia/
Gab viel Fürsilich stipendia.
Dardurch zog auff manch glehrten Man/
Der Kirchn vnd Schulen dienen kan.
Keins Menschen hertz noch zung erreicht/
Was Gott durch ihn dem Land erzeicht.
Drumb sein ruhm vnd lob nicht vergeht/
Weil Sonn vnd Mond am Himmel sieht.

Pax.

Zu frieden riecht er allezeit/
Hat offte verhüt gros krieg vnd streit.

Wann

Wann gleich ein feur ward angezündt/
Ben zeit er solchs bald dempffen fundt.

Als er befehl vom Reich bekam/
Das er in rüstung auff sich nam
Die Gotisch Execution/
Gros ehr vnd ruhm er bracht dauon.
Durch ihn gros auffruhr ward verhut/
Ein fried gestiftt dem land zu gut.
Hielt alle Strassen rein vnd frey/
Von allem raub vnd plackeren.
Kein feind sich wider ihn erregt/
Durch furcht sie all sind abgeschreckt.
Er sucht stets fried vnd jagt ihm nach/
Drumb kam er nie in vngemach.

Anno
1567.

Pf. 34.

Zur gegenwehr vnd schutz der Land/
Gros Kriegsrüstung hat an der hand/
Das solcher macht man nichts find gleich
Ben keinem Herrn im Deutschen Reich.
Doch sein hoffnung auff Christum setzt/
Drumb blieb von Feinden vnuerlezt.

Er hielt vnd schützt das Recht im Land/
All vngerechtigkeith abwand.
Der Regierung/dem Schöppenstuel
Nach recht zusprechn mit ernst befuhl/

Durch

Iustitia.

Durch sein hochberümbt hoffgericht/
Dem ganzen Land viel guts geschicht/
Das geistlich gricht ernstlich bestelt/
Drey Consistoria erwehlt/
Dadurch viel irrthumb abgeschafft/
In geistlichn sachen vnd Ehafft.

Die fürtrefflichsten Leut er hat/
Mit den er am Hoff gieng zu rath/
Gelehrt Juristen vnd Doctorn/
Erfarn vnd berühmbt Dratorn/
Die warn des Hoffs vnd Landes kron/
Gros ehr vnd ruhm hett er dauon.

Als etwan irrthumb war im Recht/
Kund ers bald wieder machen schlecht.

1572. New Constitution er stellt/
Darnach man hinsfort vrtail felle.
Das Sachsen Recht sterckt vnd vermehrt/
Welchs auch all frembd Herrschafft begert.
Ein jedern Ampt vnd jedern Stadt
Ein richtig ordnung geben hat/
Damit am Recht vnd Policeny
Im ganzen Land kein mangel sey.
Vnd das niemand sein sach verlör/
Hat oft selbst gessen in verhör/
Kein Person er niemals ansach/
Sondern was jeder hett für sach/

Wenn

Wenn straff verdient ein vnrecht Man/
Sein Schwert hat er scharff schneiden lan/
Wer vnschuldig war from vnd schlecht/
Den schützt er gnedig bey sein recht.

Weil er auch von Gott gsegnet wart/
Mit reichem Bergwerck mancher art/
Damit niemand kem in betrug/
Die wichtigst güldigst Münz er schlug/
Auch sonst in allem war bereit/
Zuhalten vber gerechtigkeit.

War sonst Gottselig in sein standt/
Kein zeit hat vbel angewandt.

Das Gebet sein mawr vnd schutz er acht/
Auff gewisse stund darben stets wacht/
Die Psalmen vnd sonst schön gebet/
Mit ernst vnd andacht brauchen thet.
Die Landschafft vnd trew Vnterthan/
Warn ihm mit ernst gelegen an/
Mit threnen seuffzet oft für sie/
Veterlich trew ihm mangelt nie.

Zu gewisser zeit hielt Regiment/
Nam selbst viel sachen für die hendt/
Der armen Supplication/
Hat gnedigst all genommen an/

¶

Wann

Wann er die not thet recht verstehn/
Vieß niemand trawrig von sich gehn.

Was sonst war vbrig an der zeit/
Hat gericht an Leibs gesundheit /
Keins Menschen leib lang trawren kan/
Wann er nicht solt ergekung han/
Scharffsinnig ward befunden er/
Kein künstlich werck war ihm zu schwer/
Viel kunststück bracht selbst auff die bahn/
Das sich des wundert jederman.

Den Armen erzeigt er allzeit/
Lieb vnd werck der barmhertzigkeit.
Reich Almosen an geld vnd brod/
Dies austheilen so oft es not/
Mit Arzney/ Pflaster vngeschewt/
Schadhaftge vnd verwundte Leut/
Hat selbst binden vnd heilen lan /
Welchs sonst kaum thet ein schlechter Man/
Dann was er dem geringsten leist/
Acht er dem HErrn Christ selbst beweist.
Als der from Churfürst thet erfahn/
Das viel Widwen vnd Waisen warn/
Der Geislichen in armut gros.
Für trew vnd lieb sein hertz zerfloß/
Solch dürfftigen aus güt vnd gnad
Ein fürstlich stiftung geordnet hat.

Das

Das jehrlich werdu in armer hendt/
Fünff tausend gülden ausgespendt/
Dhn was sonst auffgieng alle tag/
Wann für ihn kam der armen klag/
Wem Gott strafft mit wetter vnd fiewr/
Fand bey ihm gewisse hülff vnd fiewr/
Drumb hett ihn auch Gott lieb vnd wert/
Gros glück vnd segen ihm beschert/
Nam sich sein an zur bösen zeit/
Das ihm nie widerfuhr kein leid,

Pfal. 41.

In seim Ehestandt hat hoch geliebt/
Sein Königlichn Gemahl/den nie betrübt/
Nitt der er lebt die ganze zeit/
In trewer lieb vnd einigkeit.
Als Gott solch Kieb vom herzen brach /
Schmerzlich ihm leid vnd weh gschach /
Hett sie auch gern noch lang begert/
Zum höchsten schatz vnd freud auff Erd/
Weils aber so Gotts wil solt sein/
Thet sich geduldig geben drein.
Tröst sich wie Job in seiner not/
Mein Gemahl hat mir gegeben Gott/
Der hat sie wiedr in seiner hand/
Ihr Seel hat nu viel bessern stand.
Gott hat sein gfallen dran beweist/
Sein nam sey ewiglich gepreist,

Job. 1.

G ij

Weil

Genes. 3.
Weil er aber wußt Gottes rath/
Den er selbst ausgesprochen hat/
Das einem Menschen nicht sey gut/
Wenn er hie einsam leben thut/
Auch das von Gott dem Menschen frey
Der Ehestand selbst gestiftet sey/
Hertzlich vmb ein gemahl er bat/
Welch ihm auch Gott zu gsüget hat.
Aber solch Ehe Gott wieder trent/
Weil vnuorsehens kam sein endt/
Ein ziel hat ihm Gott selbst gericht/
Das kund er vberschreiten nicht.

Die gantze zeit in seinem lebn/
Zu warer B B S thet sich ergebn/
Sein sünd mit reu erkent allzeit/
Beseuffhet sie mit flag vnd leid.
Wann ihm dann Gott sein hertz erweicht/
Ohn threnen thet er nie sein Beicht.
Dauids Buspsalmen vnd Gebet/
Er teglich bey den henden het/
Aus den er stets seuffzt inniglich/
Sein ernst Gebet auch darauff richt/
psal. 6. Ach H E R R straff mich nicht in deinem zorn/
Das ich nicht ewig werd verlorn/
H E R R zücht mich nicht in deinem grim/
All mein sünd gnedig von mir nim.
Dein

Dein hand ist schwer vnd drucket mich/
 Drumb meine sünd verhehl ich nicht/
 Dein pfeil hastu in mich gesteckt/
 Mein herz vnd all gebein erschreckt.
 Mein sünd sind mir ein schwere last/
 Weil du mich gar zerschlagen hast.
 Ach Gott sey mir gnedig allzeit/
 Durch dein güt vnd barmhertzigkeit.
 Wasch mich von allen sünden rein/
 Die mir auch angeboren sein.
 H E R R Gott erhör mein herzlich bit/
 Dein antlitz wolst verbergen nit/
 Mein gbein sind worden wie ein brand
 Da ich dein grechten zorn erkandt/
 In tieffster not ruff ich dich an/
 H E R R Gott wolst mich ja nicht verlan/
 H E R R wenn du wolst zurechnen sünd/
 Kein Mensch für dir bestehen künd/
 Geh nicht ins gricht mit deinem Knecht/
 Für dir ist je kein Mensch gerecht/
 Erbarm dich mein du trewer Gott/
 In meiner schweren sünden not

Psal. 32.

Psal. 38.

Psal. 51.

Pf. 102.

Pf. 130.

Pf. 143.

Solch Psalmen new in Druck begert/ 1585.
 Wie sie Lutherus hett erklert.
 Selnecceri Psalterium
 Dies vmbdrucken mit kurzer summ.

G iij

Dann

Dann auch erklet die sieben wort/
Welch man am Kreuz von Christo hort/
Dis warn sein Bet vnd Trostbüchlein/
Zeglich draus vbt den glauben sein/
Vnd wenn er so sein sünd beklagt/
Ist er doch drum gar nicht verzagt/
Hat zufflucht zum genaden thron/
Zu Jesu Christo Gottes Sohn/
Der ihn durch seine Wunden rott
Durch sein Blut vnd den bittern todt/
Gar tewer erlöset vnd erkaufft/
Auch drum auff Christi Blut getaufft/
Welchs ihn vorgwist der seeligkeit/
Die ihm von Christo war bereit.
Damit auch sein glaub würd vermehrt/
Das Nachmal Christi oft begert.
Mit andacht selbst zum Altar gieng/
Den Leib vnd Blut des HErrn empfieng/
Vnd danckt Gott für sein lieb vnd gnad/
Der ihm sein Sohn geschencket hat.

Die schönste spruch im warn gemein/
Die in Gottes wort verfasset sein/
Derselben viel hat auffgeschriebn/
Damit sie ihm bekandt sind bliebn.
Dardurch im herzen trost erweckt/
Wenns war durchs gsetz vnd sünd erschreckt.
Sprach

Sprach oft von herzen mit dem munde/
Ich danck dir Gott zu aller stund/
Für alle gut sey hoch gepreist/
Die du mir reichlich hast beweist/
Ich acht mich auch zu gringe sein/
Aller gnad vnd wolthaten dein/
Zeitlich gut/ ehr vnd gwalt gibst mir/
Hernach das ewige reich bey dir/
Hilff das ich zu deinem dienst bereit/
Bleib hie vnd dort in ewigkeit.
Mein gut gewissen auch verwar/
Das mein seel nicht kom in gefahr.

Gene. 32.

H E R R Jesu Christ der mich erlost/
Du bist meins herzen freud vnd trost.
Vmb mein sund sehr verwundet bist/
Die straff auff dich geleet ist.
Mich habn geheilt dein wunden roth/
Das ich hett ewign fried mit Gott/
Weil du wilst mein erlöser sein/
Mit ewiger gnad erbarm dich mein.
Zilg aus mein sund/ vnd nicht dran denck/
Die dich mit arbt vnd müh gefrenckt/
Weil dein zorn werth ein augenblick/
Mit deiner gnad mein Seel erquick/
Mein herz sich frewet stets in dir/
Das du so gerne hülffest mir.

Esa. 53.

Esa 54.

Esa. 43.

psal. 30.

psal. 32.

psal. 13.

Ben

- psal. 16. Bey dir ist freude volliglich/
 Vnd lieblichs wesen ewiglich.
 psal. 27. H E R R deine güt werd ich noch sehn/
 Im lande der lebendigen/
 psal. 73. H E R R Gott wenn ich nur habe dich/
 Nach Himl vnd Erden frag ich nicht/
 Johan. 1. Du bist das ware Gottes Lam/
 Das durch sein todt mein sünd hinnam/
 1. Joh. 1. Dein heiligs tewres blut allein/
 Macht mich von allen sünden rein.
 Rom. 14. Ich lebe gleich nu oder sterbe/
 So bin ich deines Reiches erbe.
 psal. 30. In deine hend thu ich ergebn/
 Mein leib vnd Seel mit ganken lebn/
 H E R R wirck durchs wort/dein geist mir send/
 Das ich bstendig bleib bis ans end.

Weil denn sein hertz so wol berichtet/
 So sol nu kein Mensch zweiffeln nicht/
 Das er selig verschieden ist/
 In rechtem glaubn an Jesum Christ/
 Johan. 8. Wer sein wort helt im glauben rein/
 Kan nicht ewig verloren sein.

Gott hat ihn nicht lang quelen lan/
 Zu gnad hat bald genommen an/
 Vnd ohn all todes bitterkeit/
 Mit ihm geeilt zur seligkeit/

In

In seiner schwachheit man vermerckt
Das Gott sein hertz mit trost gesterckt/
Die zeichen haben auch gedeut
Sein glauben in bestendigkeit /
Ist sanfft im fried geschlaffen ein/
Sein leib fühlt nu kein qual noch pein/
Die Seel in Gottes Reich jekt lebt/
In ewigr ehr vnd freude schwebt.

Hertzog Heinrich vnd sein Gemahl/
Habu nu ihr kindr im schoß fast all/
Kugen sanfft bisz Christus kompt rab/
Vnd weckt sie frölich aus dem grab.

Dem Churfürsten ist wol geschen/
Wir aber noch im elend stehn/
Drumb wenn wir an sein abschied dencken/
Solls billich unsre hertzen krencken/
Das durch den todt sich gmacht dauon/
Des Landes Vater vnd Patron.
Drumb trawr du ganze Christenheit/
Bewein vnd flag dein grosses leid.
Gleich wie Joseph für schmerzlich flag/
Vnd ganz Egypten gar viel tag/
Als Jacob abgeschieden war/
Vnd sein leib todt stund auff der bahr.
Also soll jekund vnter allen/
Trawrig das gmüch vnd hertz auffwallen/
D Hat

Hat ers doch vnser halb getahn/
Vnd offte heiß threnen fallen lahn/
Wie solten wirs denn lassen nun/
Vnd sehnlich nicht dergleichen thun.

Herr Jesu Christ wir bitten nu/
Bewahr sein Leib in selger ruh/
Laz in sein Grab die Engelen/
Sein Wechter vnd auffwarter sein/
Weck ihn frölich zur letzten zeit /
Vnd gib ihm ewge seligkeit.

Laz dir auch Herr befohlen sein/
Sein liebste Gemahl welchs hertz leid pein/
Herzog Christian vnd die Frewlein/
Die all hertzlich betrübet sein/
Tröst sie / O Gott / durch deine güt /
Für allem leid vnd gefahr behüt /
Laz sie erkennen deinen willn /
Vnd in gedult ihr trawren stilln.
Ihr liebster Vater lebt bey Gott /
Ist griffen aus der angst vnd not /
Fürm vnglück ist hinweg gerafft /
Ehe Gott die Welt sehr schrecklich strafft /
Hat nu sein freud in Gottes Reich /
Mit sein Königlichem Gemahl zugleich /
Mit den jungn Herrn vnd Frewlein /
Die all vorhin geschicket sein.

Esa. 53.

Esa. 56.

Der

Der Herr Christ wird nu seumen nicht/
Vnd bald erscheinen zum Gericht/
Wir sehnen vns ganz inniglich
Mit ihm zu frewen ewiglich.

Herr Gott mit frewd wir dancken dir/
Das du aus gnaden stellest für/
Von des Churfürsten leib geborn/
Herzog Christian außerkorn/
Zum gewissen Regenten der Land/
Zu führen Churfürstlichen stand.
Weil solchs dann ist dein Göttlich gab/
Der du setzt Könige ein vnd ab
Wir bitten dich durch deine güt/
Den jungen Churfürsten behüt/
Wolst ihm zum anfang gnedig gebn/
Glück/seggen vnd ein langes lebn.
Auch weisheit vnd hohen verstand/
Zu regieren das Vaterland.
Hilff das er dem Herrn Vater gleich/
Glücklich für sich dem ganzen Reich.
Das er auch sonst bald in der jugndt/
Nachschlag all veterlicher tugnd/
Vnd das sein fürnemst sorg müg sein/
Für Christi Wort vnd Kirch allein.
Auch das im Land gerechtigkeit
Sey/friede/ glück vnd gute zeit.

Dan. 4.

D ij

Vnd

Vnd ob sich wolt ein sturmswind hebn/
Das dein Schifflein in gfahr möcht schweben,
So wolst gebieten Wind vnd Meer/
Vnd stören dem Gottlosen heer,
Ob sich auch wolt vnziffer regn/
Welch all bisher sind still gelegn/
Als wann die edle Raut im Land/
Ihm giff nicht thun künde widerstand,
So bitten wir Herr durch dein güt/
Solch edle raut sterck vnd behüt/
Laß sie stets grünen zu dein ehren/
Wolst selbst dem giff der feinde wehren/
Vnd widerstehn dem Ottrgezicht/
Welch deine Kirch vnd wort ansicht/
Die Schefflin deiner weid bewahr/
Für alln irrthumb vnd falscher lahr/
Vorley gedult im glauben rein/
Laß vns deins Reiches erben sein,
So wollen wir hoch rühmen dich/
Hie zeitlich vnd dort ewiglich.

Gemein

Gemein Gebet/ in vorstehender betrüb-
ten zeit/ andechtiglich zu gebrauchen.

Almechtiger/ewiger/barmhertziger Gott/
Gnediger lieber vater/ vns deine elende betrübte
Kinder haben die letzten trübseligkeiten ergrif-
fen/ vnd ist dein armes heufflein mit schwerer vnd
grosser angst/ noth vnd gefahr vmbgeben/ denn wir
allenthalben geengstiget werden. Alle vnser feinde
vnd widersacher sind hefftig ergrimmet vnd schnau-
ben trotziglich/ die blutigierigen vnd falschen stehen
wieder vns/ die Wawren deiner heiligen Stadt be-
kommen grosse lücken vnd risse/ Fürtreffliche Re-
genten vnd schutzherrn/ beneben vielen erleuchten
lehrern vnd liechtern der Kirchen/ fallen teglich hin
vnd verleschen/ vnd niemand ist/ der es zu hertzen ne-
me. Es ruffet eine tieffe der andern/ vnd wird deiner
ausserwelten bedrengnis vnd elend je schwerer vnd
grösser. Wir erkennen aber vnd bekennen/ mit bes-
trübten hertze/ das wir solche beschwerliche not/ vnd
deinen gerechten zorn vnd straffen/ mit vielen gros-
sen sünden leider wol verschuldet haben/ Du bist ge-
recht/ wir aber müssen vns schemen.

Weil aber dein zorn ein augenblick/ deine gna-
de vnd barmhertzigkeit aber ewiglich weret/ vnd lust
zum leben hast/ auch aller zerschlagenen busfertigen
hertzen/ sehnliche threnen vnd seufftzen in hertzi-
cher erbarmung ansiehst vnd erhörest/ so kommen
wir getrewer lieber Gott/ mit iuniglichem ver-
trauen zu dir/ vnd bitten dich demütiglich/ wollest

D iij doch

Soch dein gnedig antlitz vnd vaterhertz wider zu vns
wenden/vnd in gnodiger vergebung vnserer vielfel-
tigen missethat vns in betrübttem elend wider erqui-
cken vnd erfreuen/vnd deine veterliche hülffe/trost
vnd errettung gnedig erzeigen vnd widerfahren las-
sen. Sonderlich aber bitten wir mit seuffzenden her-
tzen/du wollest dem Teuffel/vnd allen Tyrannen
vnd Ketzern/die wieder dein armes heufflein/vmb
deines heiligen worts vnd namens willē grimmig-
lich wüten vnd toben/ selbs gewaltiglich stewart
vnd wehren / Vnd allen ihren feindlichen rath vnd
anschlag wider vns/hindern vnd zu nicht machen/
Vnd dargegen deine arme Schefflein mit trewher-
tigen Hirten vnd Lehrern versorgen / vnd sie bey
reiner gesunden lehr deines seligmachenden worts/
vñ rechtem brauch der heiligen Sacrament gnedigst
schützen vnd erhalten.

Weil du vns auch jetziger zeit/ zu armen betrübt-
ten waissen werden lassen/ in dem du deines Volcks
trewesten Landsvater vnd Schutzherrn / vnsern
gnedigsten Churfürsten seligen/ aus diesem elend
für dem vnglück vnuorsehenlich weggerafft/ So bit-
ten wir ferzner mit demütigen hertzen/ du wollest
in solchen riss vnd lücken/ mit grossem glück vnd se-
gen/wiederumb einstellen/vnsern gnedigsten Chur-
fürsten vnd Landherrn Hertzog Christianum/ vnd
sein C. G. mit hoher weisheit vnd gerechtigkeit/
wie König Salomonem/mit warer Gottesfurcht
vnd bestendigkeit / wie Josiam/ vnd allen andern
Christen

Christlichen vnd hohen Fürstlichen tugenden/ bey
friedlicher glückseligen regierung/ vnd bestendiger
guter Leibs gesundheit/ zu deines heiligen namens
ehre/ vnd zu des lieben Vaterlandes vnd der ganz-
zen Christenheit/ schutz/ trost vnd wolfart/ beneben
seiner Churf. S. hochgeliebten Gemahl / jungen
Hermlin vnd Freulin / gnedigst vnd veterlichst
segnen / begnaden vnd erhalten.

Wollest auch sonst/ von vns deinen betrübten
Kindern/ alle gegenwertige not/ elend vnd bedreng-
nis gnedig abwenden/ vnd für künfftigem vnglück
vnd gefehrligkeiten / behüten vnd bewaren / Vnd
vns mit deinem Gnadengeist regieren vnd führen/ das
wir in deinem gehorsam/ Christlich vnd Gottselig
wandeln/ dir in Christlicher gedult/ rechtem glau-
ben vnd guten gewissen/ treulich dienen/ vnd her-
nach bey dir in deinem Reich ewiglich leben / vnd
vns freuen mügen/ Solches/ wollestu vns aus gna-
den helffen vnd verleyhen / vmb Jesu Christi
deines lieben Sohns / vnsers einigen
Erlösers vnd Seligmachers
willen/ Amen.


L. F.

Bedruckt zu Leipzig / Durch
Johan Steinman.

1 5 8 6.

Faint, illegible text in a Gothic script, likely bleed-through from the reverse side of the page. The text is arranged in several lines and is difficult to decipher due to its lightness and the texture of the paper.

Sechste Buch
Zweite Ausgabe




153832


ULB Halle 3
001 539 833



Sb.







Christliche
Klag und Grabschrift/

17
Des Durchlauchtig-

sten/Hochgebornen Fürsten vnd Herrn/Herrn
AVGVSTI/weiland Herzogen zu Sachsen/ des H. Röm.
Reichs Erzmarschaln vnd Churfürsten/Landgraffen in Düringen/
Marggraffen zu Meissen/vnd Burggraffen zu Magden-
burg/ıc. vnsers gnedigsten Herrn.

Welcher in Gott seliglich von diesem jämmerthal abgeschieden/
Anno Ch. 1586. den 11. Febr. vmb 6. vhr gegen abend/
Seines alters im 59. jahr/ 6. Monden/
1. Wochen/ 5. Tage.

Das Begrebniß ist zu Freiberg gehalten den 14. Martij/
Montags nach Letare.



Seiner Churf. G. zu ehren vnd rühmlichem gedechtniß/
Auch allen frommen Christen/ in jetzt gefehrlicher betrübtten
zeit/ zum trost/vnd trewen erinnerung zum Gebet/
gestellet / Durch

Laurent. Faustum/ Pfarrern zu Schirmenitz.